

COMUNICÂT STAMPE

IL FURLAN A SCUELE CHEST AN SI SIELÇ CUNTUN "CLIC"

La opzion pal insegnament de lenghe minoritarie e je providude tai modui on line dai istitûts

Udin, ai 25 di Zenâr 2013 - La rivoluzion digjitâl che chest an e rivuarde lis matriculis des scuelis primariis e secundariis di prin e secont grât cun l'oblic di presentâ la iscrizion vie internet, seont ce che al proviôt il ministeri de Istruzion, si slargje ancje ae "opzion marilenghe".

Di fat i gjenitôrs che a iscrivin i fîs a scuele a àn la pussibilitât dentri dai 28 di Fevrâr di sielzi par l'insegnament dal furlan dome cuntun "clic" dal mouse. Te mascare "ativitâts e progjets ufierts de scuele", personalizade di bande dai istitûts su la fonde di une direttive dal Uffici scolastic regionâl, si cjate la domande di stricâ sul SI "o intint valêmi de insegnament de lenghe furlane".

Daspò i ultins numars a disposizion su la adesion des fameis ae educazion plurilengâl (39 mil adesions, il 9 par cent in plui rispjet a l'an prime) ce che si spiete e je une ulteriôr incressite ancje par vie dal investment di doi milions di euro che la aministrazion regionâl al à fat tal 2012-2013 par inviâ l'insegnament dal furlan te scuele de infanzie e de primarie.

L'elenc regionâl dai docents di furlan, providût de leç 29/2007, al è daûr a insiorâsi e al è pardabon un passaç impuartant par vie che i dirigjents scolastics a àn manifestât une grande dibisugne di personâl cun competencis ricognossudis par stâi daûr ae domande des fameis.

"Al vâl la pene di ricuardâ - al comente il president de ARLeF Lorenzo Zanon - ai gjenitôrs che a son in dubi sul cemût rispuindi a chê domande che l'insegnament dal furlan nol pues che fâi dal ben ai lôr fîs e che l'imparâ une lenghe minoritarie ju judarà ancje tal aprendiment di une lenghe di comunicazion di masse tant che l'inglês".

L'auspici di Zanon al è propit chel di considerâ la adesion al insegnament dal furlan tant che une ricjece in plui tal curriculum dai fruts, "par insedâ miôr lis lôr lidrîs ae nestre tiere, sintiment che al risulterà impuartant cuant che si cjataran atôr pal mont".